

Sebuah Syair Perihal Ilmu

Ampuan Haji Brahim Ampuan Hj Tengah @ Brahim A.H.T

Assalamualikum ilmuan tersayang
Semoga sihat ceria dan riang
Meneliti mengkaji setiap ruang
Jalan yang gelap menjadi terang.

Awal bismillah membuka kata
Menyebut Allah Maha pencipta
Rahmatnya junterah merata-rata
Terhampar seluruh alam semesta.

Ucap selawat ke atas Muhammad
Rasul Junjungan pembawa rahmat
Nabi terakhir pemimpin umat
Syafée'ul Ummah di Hari Qiamat.

Syair ditulis mengenai ilmu
Sentiasa dituntut dari dahulu
Dalam kerugian sudahlah tentu
Jika umur dan ilmu tiada bertemu.

Dalam sejarah nampaknya megah
Konkrit dan abstrak petanya indah
Tindakan fikiran tinggi tak rendah
Tamadun bangsa jelas terserlah.

Para ilmuan para sarjana
Orang yang arif lagi bijaksana
Menyanjung ilmu barang ke mana
Menyelidik sendiri atau bersama.

Bermula dengan permasalahan
tujuan objektif jelas jelaskan
Sesuaikan cara keadah tulisan.
Mencapai maksud yang diharapkan

Menulis merangka hasil dapatan
Daripada data-data yang ditemukan
Mengenai manusia dan kehidupan
Untuk kebaikan kesejahteraan insan.

Penelitian kritikan berhati-hati
Menulis gagasan mesti bererti
Memberi manfaat pasti jauhari
Balasan akhirat matlamat dicari.

Kajian lepas paling utama
Tahu dalam tohor sungainya
Teruslah belayar menyusur riaknya
Sampai tujuan tepat waktunya.

Berlapang dada dalam mengkaji
Jangan marah atau membenci
Kosongkan fikiran senangkan hati
dapatan diperolehi nilainya tinggi.

Data diambil buat rujukan
Sumber mana pasti tentukan
Salin tiru mesti kuburkan
Menjulung angkat para ilmuan.

Jika tiada berdasarkan data
Atau rujukan mempunyai makna
Orang memandang sebelah mata
Nescaya intelektual kurang ternyata.

Ilmu bersinar di perguruan tinggi
Memancar dalam hati nurani
Menerangi lorong dan liku terkini
Supaya hidup lebih harmoni.

Ilmu bertambah tambah bijaksana
Bakti dicurah tambah bermakna
Hormat menghormati tuntutan agama
Berganding bahu majukan bangsa.

Ilmu ibarat indahnya taman
Bunga berbunga subur halaman
manusia bernafas hidupnya aman
Mengirup udara, bersih dan nyaman.

Anak-anak yang baru melangkah
tuntut ilmu janganlah gundah
hasrat niatkan kerana Allah
Dunia akhirat menjadi indah.

Wahai sarjana para ilmuan
ilmu dituntut terus majukan
perluas perdalam serta sebarkan
tiada berkurang malah dibanyakkan.

Perkara baru sentiasa diburu
Dikaji diselidik bersama guru
Segala tindakan jangan terburu
Al-Quran mesti dijadikan pandu.

Dalam menulis suatu makalah
Jangan sesekali lupakan Allah
Tawakal berusaha birahmatil-laah
Agar pekerjaan menjadi mudah.

Akhir madahku ayuhai teman
Mantapkan ilmu, taqwa dan iman
umpama bunga penghias taman
Harum semerbak wangi halaman.

Umpama pohon lebat buahnya
Di samping lebat rendang daunnya
Buah dimakan banyak manfaatnya
Tempat berlumbu duduk bawahnya.

Pohon rendang dapat berteduh
Daripada angin musim tengkujuh
Hujan dan ribut tiada teduh
Malam gelap terang bersuluh.

Alhamdulillah mengakhiri kata
Syukur kepada Maha Pencipta
Memberikan rahmat setiap masa
Menjalani hidup yang dikurniakan-Nya.

Madah umpama sebutir pasir
atau sira hanya sebutir
hati bimbang lagi kluatir
kata bicara tersalah tafsir.

Assalamualaikum ilmuan tersayang
Sekianlah saja syair dikarang
Ambil yang baik buang yang kurang
Yang penting semua berhati senang.

Putrajaya, 8 Oktober 2022

Biodata Penulis:

Brahim A.H.T atau nama sebenarnya, Ampuan Haji Brahim Ampuan Hj Tengah merupakan penerima Anugerah SEA Write untuk tahun 2005. Beliau dilahirkan di Kampung Batu Ampar Pengkalan Batu, Brunei Darussalam pada 4 Disember 1955. Memperoleh ijazah Doktor Falsafah dalam bidang Persuratan Melayu dari Universiti Kebangsaan Malaysia pada tahun 1998. Prof Dr Ampuan Brahim berkhidmat di Universiti Brunei Darussalam sejak 1989 dan pernah dilantik menjadi Dekan di beberapa buah fakulti. Terbitan terkininya adalah “Perbandingan *Merong Mahawangsa* dengan karya historiografi Brunei Darussalam” termuat dalam buku *Hikayat Merong Mahawangsa Karya Agung dalam Sejarah Kesultanan Kedah*, terbitan Dewan Bahasa dan Pustaka, Kuala Lumpur (2022).